

摘藻堂四庫全書薈要

集部

欽定四庫全書薈要

集部

宋詩鈔卷三十七



詳校官候選知縣臣吳甸華

欽定四庫全書薈要卷二萬二百九十

集部

宋詩鈔卷三十七

內閣中書舍人吳之振編

陳造江湖長翁集鈔

造字唐卿淮之高郵人自以無補於世置江湖乃宜
又以物無用曰長物言無當曰長語故稱江湖長翁
年二十五始學儒四十三登乙未科尉繁昌改教授
平江府叅政范石湖曰使遇歐蘇名不在少游下尋

知定海縣授朝散郎淮南路安撫司叅議官病卒陸放翁序其集謂能居今篤古卓然傑立於頽波之外其詩椎鍊不事浮響故見許如此

寄二孫

憶昔初抱孫雙鬢颯已秋眼看與我長歲月如許適我以薄宦西汝爲守舍留夢輒來後前歲律歛再周想今與迺父長我更半頭天姿粹而溫整整靜不浮六經如取攜八面自優游落筆動萬言頗能如翁不如翁何足

道抗志須前修良匠有妙斲情農無厚收彼哉碌碌者
不源而計流吾言不虛徃過是夫何求

右序

阿秦幼儻蕩勢若泛駕馬暫別已束髮折節殊曩者誦
書口瀾翻晝夜曾不捨課宵犯雪供筆亦揮汗把才地
校優劣不在阿儒下平時於方兄眇視真土苴念翁少
年日爲學不餘暇混俗類踈放秉心迺儒雅兒今頗肖
吾解笑時苟且師匠求有餘好書不外假緬懷螢雪邊
力倍功更寡可用吾季孟直輩古班賈

右序

七月附米舟之浙中作

白蟲散如蛆黑蟲聚如蟻
循緣仍啞齧欲寐復九起
吾舟玉爲粒生此果何理
神奇作臭腐秋暑況如燬
人生託洪爐一飽蓋分爾
臨流念彫年胡廼置身此
笑口忽喈惋曼膚或瘡痂
隄防費應俗情僞良不美
短籬護松菊吾歸殊可喜
錐刀詫朋儕嗟爾商販子

邵伯停舟辟雨

去年是日之山陽辟雨繁梁作菩薩蠻云

窗度荷芰風舟艤鴛鴦浦
落帆憇篙師避此白淙雨
長

征取愜快留滯不云苦適喜縣庥勢爲盪鏢石暑去年
舟繫柳卧看虹飲渚龍公會事發尚記跳珠語崎嶇不
諧俗似爲龍所予一杯酬新涼開瓶先酌汝

過樊村

襄鄂二千里何啻三百灣風色九順逆左往復右還舟
行已三日沿流不作艱即今蒼煙面猶是泊處山信次
有定期曲直了不闕聊可供戲事輕橈與回環

贈錢郎中

利方利祿媒抱道俗不省詩書工發冢孰起世儒病錢

侯挺直節蠻徼復蘭省劒氣夜星明鵬翮秋霜耿上前

論世務萬乘爲首肯平生中原慮壯歲左符請不作黃

閣想擬試白羽秉孤忠當寧知宏圖時宰領羣兒須圓

曲謂可力勝命彼此計乘除得甕喪崇鼎平生信所得

一鑑照萬境幕中辭脂韋客右進嚴冷主簿聳牙伯評

俗怒生癭

謂伯永

令君強項翁爭事不藏穎

謂劉山陽

但有周

舍思可無衛武警我亦意行者泥古志未逞朝來聽名

理剪燭延落景寸田殊易荒有賴剔榛梗效竒乏良策
汲深慙短綆惟期佩公言不墮頽俗甯

八月晦試院中作

官居課程地生有文字癖誠知蟲負山詎得辭此檄嘉
禾古多士孰者非巨擘老眼不待封舊苦眩花隔勿云
石賈玉箴失眸亦得

荀子云失箴者眸面得之

捧心若為妍竊鉄徒

自匿陸海貪窮搜竒寶多偶獲巧常昏金注勇或便大
敵清醕聆鄒琴款識辨周鬲頗收半段槍遐念連城壁

渠應悔羔袖吾敢厭雞肋撫囊奪利穎體國免素食明
朝羅客拜定自百夫特俗無拋塼惡歸舟緩張席

三月初晚晴寄高縉之三首

東風埽積陰殘雨不敢漂壞雲裂裳帛倒掛陞嶺腰烏
影不作暝夕陽明山椒安得上上頭風露永清宵

人家繡閨閒湖上粧面新湖山簫鼓中魚鳥安得馴山
靈建飛雨淨洗綺羅塵即今隄邊柳爲誰管殘春

曲欄倚青冥萬井入指顧湖光漾明霞照我凭欄處森

木倦鳥歸遙空征鴻度定知待月人破竹有奇句

車堰牛

牛力輕萬鈞性順異諸畜有足不解跂有角不皆觸課
日引耒耜爲人給穀粟私家愛闕食公家要餘蓄公私
雖相須置汝誰取足奈何過堰客行舟動千斛挽牽亦
諉汝顛顛頸髀縮扣角一勞之不語對以腹物生愧無
用懷安或作福於人儻有益塵身豈云酷君看廟前牲
被繡飽芻菽膏血薦鼎俎誰定悲觳觫

舟行即事

昨日出曹娥明日指慈谿待潮舟爲膠得潮舟若蜚留
滯復一快計程元不遲人生意失得孰者乘除之今屈
昔已伸彼羸此或虧但可自適過尚用悲喜爲水伯愚
弄人政如造物兒丈夫木作腸渠革未易知

餞寄定海交代

縣尹古子男今不一錢直低催奉簡書偵伺常屏息白
簡與按章歲月供彈劾當路雖所懼姦民巧狙擊吻間

售蜂蠆意外變黑白防虞莫救過彌縫或逃謫政使有
卓魯未容置形迹云何世難事君不動聲色編民翕風
移惡少且心革田廬有嘯歌魑魅亦竄匿斯人紀仁愛
幾磨南山石政聲懿如此僅免繩治厄諸公蜚鶚書犯
嚴尚遺力安得定海民爲君灑薦墨蘭臺傳循吏採訪
多失實安得定海人爲君秉直筆嗟我吏隱者志在山
南北身名萬金重如博試此擲賴今遺愛地一一可矜
式政恐效西子美顰得嘲嚬江皋一樽酒聊挽朝天客

妙樂喧江浪清譚到理窟盟言底遽寒舟駛潮水急西
望念風義感歎徒至骨

送李象山趨朝

象山海邑古稱象山郎今聽
李明府言頗亦費支拙故云

書肘詎容掣笋柱不可膠付事多其防職業自寂寥頗
思圓機士細苛舉網條宰邑古難之茹苦耐煎熬百抑
不一揚推波益驚濤由來法愈密祇爲下所操一饑驅
我出銅墨強折腰捩翅著籠中側睨鵬冲霄平生有知
已持橐貳銓曹君來定倒屣道我不自聊願推變通術

霧雨均枯焦而况代舍舊肯惜引手勞

十二月二十六日趨府

誰謂一舍遠不辦三飡趨亭午縣市西衙鼓府城隅匹
馬驚鳥去指槌冰在須北風挾霜氣萬象付摧枯想當
折琴絃未怪裂人膚馳裘被甲如是日有若無客首不
暇回顧客少踟躕出處不能同勞逸爲之殊龐翁馬少
游似非隱者徒鄉居老躬耕飽溫得自虞婆娑銅墨間
盍亦省頭顱蓑糲脫中熟吾口良易餬

別俞君任通判

一代石湖翁韓歐或其儼當時出門下如君屈幾指論
定難爲才我乃輩多士椎成方未噐正賴君礪砥師友
繫魂夢栩栩輒千里驚見得此客乾鵲預爲喜一笑破
千憂天幸寧有此石湖條眼中此翁真不死

邵伯阻風小泊贈送行諸公

長征每愛日小泊未還意陰風自南北客子聽軒輊召
棠望吾鄉不作秦越異船閣鴈鷺洲人穿魚鰕市相逢

各吳語知識十三四水實不自買海錯有佳饋餞行餘
十客超俗見友義笑譚寒谷春為我洗羈思相與卧王
瓶跋燭得微醉老懷易作惡別語毋動喙

魏帝廟

佛狸歲末卯志欲吞宇縣當年江飲馬腥血浸淮甸無
人飯耕牛有井巢歸燕至今閱遺史為汝空飲恨緬想
瓜步留殺氣纏吳分云何此山椒遺像儼高殿無乃甘
事讐吳俗昧所見或復綿歷久後嗣忘敵怨冥漠彼有

識福汝吾敢信君看趙與薛狗國冒禍釁魏侯繼前躅
長呼死白办胡不尸祝之香火均遠近豈但祈神休抑
使頑懦奮誰令決從違引手適我願

趙侯立薛侯慶魏侯勝皆淮南死事

將也

長蘆寺

昔年望長蘆去江逾百步垣宇呀已缺浮圖歌欲仆僧
徒噬肯留日有沉溺懼重來舒望眼佛刹非故處安衆
得亢爽定遷酬夙素似聞瓶錫侶復作醯蚋聚居人禱

蠶麥行客乞泉布營者肆夸侈施者不顧慮百堵煥金
碧奚翅復其故徃徃豪雋人四壁有未具彼徒創寺意
取鎮湍濤怒向來梵唄所脩爲蛟螭據在已不自保誘
俗說依怙波流置不省此理吾未諭

泊慈湖北岸

坐覺江流平漣漫裂三股舟子告風橫因循宿中浦慈
湖古戍近猶復小江阻漁翁家葦間蝸舍無隣伍把酒
訊三老此寧泊舟所諗我今昔異解帶無所苦向來探

九徒白晝猶旁午一自尚書來此革凜刀俎江山亘千
里有屋皆外戶似聞襄江道衽席過行旅翳公舊威愛
平寧尚如許兩地好經行爲官喜欲舞倒牀鼻雷吼夢
破聞船鼓受欺墮姑息迂儒彼何取

謂張尚書定叟

上下驛磯

湖陰數里間山麓屹兩磯磯麓突江出禹功不及施千
古妨行舟死生繫毫釐我昔步磯上雨歇暑氣微驚湍
下百尺怒勢轟千輦尚憂坤軸動無怪沙岸歌蟄龍渠

得安過鳥翅欲垂頭眩膽爲掉坐歎舟上兒壯哉天下
險姦軌容抵巇如身護風寒要地此幾希今來歲華暮
去舟良坦夷人言水進退寒暑分盛衰古來設險守亦
有可易時函谷與劍閣秦漢嘗用之人輕地亡重正煩
折筭咎恃險無興國興國須藩籬帝王所取重文武各
攸司險易倏變改即磯餘可推

蕪湖感舊

下帆同鳥棲掛帆逐雞起但見蕪湖月耿夜清如水江

左此壯縣我昔舟屢艤諸公各敬客款曲豈今比酒杯
慣邀留妓圍供燕喜流連動十日

每過蕪湖朱丁諸公約以十日爲期揮

掃或千紙舊遊想如昨故交今餘幾逝者泉壤隔存者
參辰似浪憑楚些招盍寄相思字可能喚巫陽且欲託
雙鯉

過繁昌

江山互映帶竹樹渺隱見居人江山間安處忘古縣泊
舟穴子初舊觀儼自薦嶺山高挽雲雲際抹深靛慰我

塵埃容嘉此煙雨面山脚慣奔走尉曹分卑賤縣人應
指似髻改顏狀變漂零渠未知憂患嘗欲遍俛仰二十
年轉盼閱蜚電故人半在亡在者或海甸明朝理去楫
山影暝江練安得人如山來往長相見

繁昌早發

客行固塵身留滯如振翼及茲祖禮竟尋食理帆席風
停浪未蟄天曙月正白版磯滙湍殺荻港煙樹碧杖策
丁家洲徙倚容少息無酒問山店憶鱸聽村笛烏啼

松竹鴈鴒下沙磧回柁投曲澳又寄糝潭夕情疎或易
合不作淮楚隔纍然槁項翁軟語慰行役

泊海子口

池口至海口望望三舍外辰發莫已到回首西日在風
師肯憐客祖道煩一噍我舟疑凌虛楚山真歷塊蜚鳥
相讓疾驚浪乃弗逮窮途坐局縮頗嘗得此快遶邁自
本圖闕供恐貽悔未辦問村醪且計具薪菜

泊小姑山

楚山屹兩姑我見乃其稚聞名詩卷間識面客舟次王
刻極端麗簪植暝蒼翠娟月上天角相與詫嫵媚怒風
將我西未慙卜晚憇山足舟可艤山木纜可繫山外正
風波獨此佳食寐斷知有神物主此勝絕地明朝捐行
橐可無答神賜白鵝雪爲肪綠蟻香馥鼻舟穩風又熟
無乃契神意未暇訪彭郎辭費辨非是

郭家洲

攜兒上絕岸微徑步蒙密人稀鳥鳥樂老屋幾百室荒

涼郭家洲籬落映殘日問俗得周旋
磨門頗蒼卒興衰
今昔殊郭姓尚十七鄰里闕鹽茗翁
姬僅盥櫛共說頻
歲歉平陸江浪沒場圃或潭洞椽
拱行蟪蛄去秋微收
爾樵採取黔突接耳多樂郊一去
恐兩失吾邦有杜母
撫我不待乞蠲租桑柘在休役孫
子佚意使流殍無寧
後倉廩實官今潯陽來吏師那容
失書紳拜此賜知我
佐郡紱古來裨肉食多自蒟羌出
必若窮吏道孰先究
民疾剥膚快目前吾固笑無術

離富池

江流寂無聲，明滅窻月曉。客枕歸夢餘，意先西蜚鳥。雪
天信少風，翳面正繚繞。富池忽信次，肯羨鵬鷖矯。向免
犯險艱，神惠顧豈少。今晨有佳興，調笑向諸小。波平旗
脚直，康莊馳驟裹鱗鱗。到座隅，健鵲啄林杪。人家積蘇
間，山影橫練表。未成官縛去，得句吾事了。

龍眼磯

甚小而巧
漁者聚焉

誰謂石一拳，不作江流礙。朝來揚帆西，瞥若驥歷塊。龍

眼風火礮培塿視華岱似聞潢潦時亦復鼓湍匯鑿去
本不難奇巧禹所愛其上嘉樹密具側魚網曬居惟羨
漁鄉復欲老犢背西歸儻得此庸敵七里瀨

次臧秀才讀蘇集

秀才甚文
予未識也

自我得蘇集玩閱幾忘年汲甘乏脩綆適遠疲短牽取
一九不隨望若終茫然子齒始半我用志超我先晶熒
出秀句妙斲遺雕鐫此翁深堂奧駢闐誰敢專潢污置
不云學海須百川怪子介且方落筆盤走圓子真蘇門

徒豈獨長短篇平生脩月手不補衣履穿秦黃晁張陳
衆星耿霜天世儒昂其首指似如登仙子起斯人後遊
刃牛無全邢娥望可知衆女空丹鉛何時班荆地解我
心懸懸即今清夜夢不止懷昔賢

雪夜與師是棋次前韻

投醪士或醉說梅人不渴窮途餘樂事不受憂患逼詩
可供呻吟棋亦識死活朝來喜雪句神藥胎可奪一枰
與兒晤斷無市聲聒既免沈舟諼不作賭墅謁指冷良

易忍眼花苦爲孽疏置仍作罫隨意略細閱瓜葛勝負
間時亦近屑屑策幾奇兵塵地比弱王割吾非江左管
舐犢愈愛說升沈作豐悴今古無成說家居鼓吹具藉
以保晚節掀髯得一笑爲汝倒蕉葉袖手聽殘更紅麟
瞋晴雪

再次韻

雪應時可喜晴不遲尤
可喜雪止怡除夜因作

人間十日雪已潤夸父渴宿雲忽披靡羲馭與抑遏春
從九地回旋放牙甲活主張披拂是大塊司予奪椒栢

追時序鼓吹聽曉聒詩壇有同盟辦作銜袖謁得雪晴
更佳過是或爲孽羣山半披剝衆巧獻一閱懸知兵吏
集不待鋪木屑令尹活人手小試牛刀割廣文甘僻左
不肯事容說與俗分樂事盍以韻語說獨慙長鬚送不
量好時節六一謂聖俞曰山婦云好時好節送詩攬人家不知吾輩所樂在此要須百篇
富趁此梅木葉正使領兕觥快作湯沃雪

至喜鋪

外朝走馬息險絕欲無路駟駿威萬蹄勢若敵場赴崩

騰臨空曠踈足此小駐蕭然一驛傍為此數家聚川城
南山下邑屋隨指顧行人不勝喜息駕始此處楚然愀
然意南北分來去我解房州印初試歷險步胡為亦自
得不作罷茶慮鄉心建瓴水歸夢受風絮殘年歸來引
他日遂初賦是役固已勞端復酬夙素臨風搔白首一
笑飭徒御

涑口守風

辦舟留襄陽辟風泊涑口得行秋甲辰初到夏癸酉跋

鬘已自慣束髮至衰朽坐是冥得喪况復多病後絕憐
操舟兒不措脫穎手顧瞻峴山亭覲面可奪取微風吹
薄暮霽景掛高柳涼月欲略箕陰氛尚侵斗明朝起拖
計未敢決可否身已不藉在心自無何有一事萌一意
但見掣君肘擁書坐蓬窗醉我不以酒

赤口灘

漢江多惡灘赤口乃其最前年将家上正值江流殺奔
衝震溝猷狼石森戟鏃崩崩取進寸一跌尋丈退聞此

尚痛定躬履况兒輩今者劈箭去未覺有湍匯一雨動
三日遠岸卷澎湃向者險巖地了不經眼界三老笑相
語無復憂滯礙路可屈指計歸將平心待窮塗偶快意
此惠莫謀大龍公本何心賤子多感慨

旅館三適

子以病愈不食麵此所嗜也以米饗代
之且宜燒猪客有惠清白堂酒者同時

饗作三
詩識之

厥初本禾種移殖雲水鄉粉之且縷之一縷百尺彊勻
細鹽吐緒潔潤鵝截肪吳儂方法殊楚產可倚牆嗟此

玉食品納我蔬菽腸七筋動輒空滑膩仍甘芳豈惟僕
餐餌政復奴枕櫛即今弗泊感頗思奉君王

雋永項上嚮紅嫩劣帶骨彼美大欄君坐受羣毛朝鼎
涪走真味正藉松炬燒芼我銀絲窩葱豉巧和調堇塗
非所宜淑郁如蘭椒腹腴但下隸羶根合藤條併填長
翁腹未覺喉牙搖但訝大嚼餘無補詩腸枵

佳齊肯見分春意偕客至誰將清白名言代碧香謚起
淪饒磁甌玩吮色香味醍醐馥牙頰沆瀣沃肺胃桑落

古宜城不足偕品第我病久不飲此日欲小醉快哉羈
寓中乃遣拜嘉惠一盃先晨飯歛作凌雲意米托薦燒
豬佳此三者備飽足仍酣醺眇睨人間世

官務

磨陲為官多曉了未更歷今世從仕者萬口用一律文
按日從事鴈鷺竊投隙自謀脫悔吝初肯計易劇追逮
有踵接符牒動山積豈念南畝民晷刻校日力停犁聽
上命質衣供旅食誰定老我師黠民幾鬼蜮締彼刀筆

吏表裏肆狙慝奈何食肉人立說與推激此論儻不破
此弊終未息揆予閱世熟敢此論在職

命書

命書唐濫觴委源傳呂後有倡莫為過波蕩今不救字
育叵數計八字詎所囿甲子動坎億舉一百萬漏荒唐
無稽据誦言指休咎奈何聰達人頗復安此謬懷刺曳
長裾偃蹇文士右夸詡走干謁薦墨不待叩士有待濡
沫百請不一售我昔遊江淮知識間新舊文士不到眼

此輩日交遊辭章輕盃水羨彼行索富鰓鰓問利祿吾
儒所深陋自笑與世違迂論取排詬

財昏

師昏古所辭財昏今不耻傳祀合二姓古者貴由禮四
德五可外貨賄亦末爾民風日就頹捨此爭校彼媒氏
未到眼聘資問有幾傾篋指金錢交券舉租米東家女
未笄儀矩無可紀已聞歸有日資送耀鄰里西家女三
十閉戶事麻桌四壁漏風霜行媒無畱趾坐貧失行期

趣富貴貪鄙流弊例不免其源實此起多約或少酬暫
譽甘長毀坐令親舊歡詭譎變狐鬼何況性習間貧富
岐臧否土俗未易挽人情大不嫩悠悠何足道吾以諗
君子

聽政

為政貴中和徇古無取無心斯善應奸譽乃其靈奈
何聞見間往往用心誤扶弱抑其彊古或垂此譽世異
俗且殊處今猶徇古曲直本不昧彊弱豈所據君子不

此恤情偽溷丹素富室被剝朘日有貧窶慮士夫受加
陵悔不齒編戶羸弊取必勝玉色吞氣去不知世富室
如母子所怙不知意定向未語機已露傳繼用一律抱
冤莫赴愬用是致和氣南首問燕路

錢弊

為家重墻垣為民湏貨殖楊廬國百戶東南賴控扼淮
民魚米餘百貨仰殊域用銅防外泄用鐵乃奇畫一利
伏一弊救弊要得策持貨貿官券捨此莫衣食錢貨天

下用鐵乃限南北坐令兩淮民塊處斷貿易計鐵取券
直十纔取六七朝賢愛淮民此困盍矜恤銅鐵均國寶
通變豈無術近甸視遠地未可岐嶵域況今苦倒垂倚
待振焚溺緣江八郡爾雜用顧何失官券朝北來淮俗
暮安宅即今私鑄斷胡尚膠今昔吾貧復淮人計勢不
容默

吳節推趙楊子曹器遠趙子野携具用韻謝之

平日從俊遊寂寂坐多病犯床漫飛埃瑤笙罷重請

床犯

置樂器床謂宮調相
犯修樂器惟生曰請

昔遊喜復到風物他日盛坡恐名

燕支樓亦詫端正新交間舊友氣合宮羽應譚塵冰霜
厲筆陣鸞鶴勁吏隱分樂地與世不好徑拔貧辦一歡
挾貴輕百乘四豪載酒過講德珠壁映歌奏雲近人舞
罷鸞顧鏡醺酢忘主賓笑語似紛競朱樓識阿眇白酒
醉師命明朝耐殘醒江聲醒幽聽此樂謫仙後同異君
試訂四豪成風手可但隻字警我投詩社名拜手敢貌
敬

記夢示師是

青燈寒夜思吾鄉
合眼便生吾家堂
阿丁炯然目如水
綵衣翩僊趨我傍
中心喜之謬督過
還為遨嬉廢書課
指似斜日西窗紅
小賦未破書未供
向渠不敢思勝義
亦憐忸縮不自容
蝶蜚鹿失忽驚寤
撼撼霜風在庭樹
幾時筆力跨乃父
與汝相忘不關慮

題胡處士猿麋圖

畫工神品今代無
祁嶽一脉傳醉胡
幾年傲睨不落筆

乘興掃出赤縣圖今君所寶亦第一我疑神遇非有筆
青林紅葉晚未暝遙山遠水秋一色五猿踞石相因依
兩猿掛樹松枝低仰睇側顧麋善疑其二行齒如不知
昔人畫馬師廐馬畫山直付居山者野猿不馴麋易驚
邈影渠能寫閒暇草露空荒遠刀几即今放麋誰氏子
山蜂負毒不足憐盍貸蠪蛸畱報喜

布穀吟

人以布穀為催耕其聲曰脫了潑袴淮農傳其言云郭嫂打婆浙人解云一百八箇

烏何與人事人以意測之是非皆不同為作此

潑袴不容脫鳥語徒慙勤輸租質農器有袴那解新官
中催科吏如虎告時趣耕爾能許即今春種未入田安
得縣胥知愧汝卑棲俛啄良易謀聒聒彊任田家憂啼
時未旦夜不休班班血痕銜口頭人將近似測禽語汝
意真解憂農不或傳悍妻天所怒姑不可撾渠不顧罰
為此鳥聲震愆警世母為郭家婦南方諛佛古到今人
持數珠家梵音區區說似一百八譏訶勸相知何心浙
風淮俗隔江水意解禽言乃如此蘇黃妙句誰嗣之兩

地流傳併湏紀世間儒墨紛相攻巨細彼此臧穀同爭
如痛飲卧長晝付渠馬耳謝東風

墾山叟

雜木漫山誰所種居不臨流多不用九月霜風捲黃落
羣山一夕皆班駁遙看拖帔橫祿衣農家刈粟山有畦
家家墾田日嫌窄荒林翳薈惜虛擲斲荒作熟不掛籍
輸官之餘給衣食州中之政常近厚不欲屑屑校升斗
寧其棄之聽民取實亦藉是作康阜繼承不皆惠慈守

汝湏彌縫吏胥口防有後來規稅畝

竹米行

竹君亢宗擅楚墟一一修聳山澤臞風流秀整與世殊
楚俗食息皆爾湏薪之籬之且遽篠筭筥箱篚簞簋
溝瓦厥祖羨其維隨索斯獲掇諸塗今歲麥秋旱歲餘
得麥僅足償官租竹君憫農如士夫著花結實千林俱
密砌玉粒綴琉珠株株擷取雖錙銖彌頃畝無閒株
磴磨蒸炊勝雕葫鄰里乞索水火如坐令顰蹙興歌呼

野叟好事能分吾香清而冽甘而腴此君行能不一書
此惠及物旋就枯摩頂放踵忘其軀所學無乃墨者徒
老子苟祿天之隅袖手無策蘇婢孤投七三嘆吾慙渠

田家歎

五月之初四月尾菖蒲葉長棟花紫淮鄉農事不勝忙
日落在田見星起前之不雨甫再旬秧疇已欲生龜紋
近者連朝雨如注麥隴橫雲欲殷腐如今麥枯秧失移
舉手仰天禱其私秧惡久晴雨害麥兼收並得寧庶幾

餅托登盤米藏庾儂家歲寒無重糲豈知送日戴朝星
凡幾憂晴幾憂雨吾儕一飽信關天下飭敢忘田家苦
春雨寒甚作長句

白龍天飛宜莫測吳儂解數歸消息年年青帝發生時
妒妒園林春動色西山龍母誕彌月歸覲親顏供子職
壽觴瓊醴俗共傳玉鱗素鱗誰所覩酸風鼓寒苦霧塞
行人縮頭欲僵立蛟鼉凍蟄大木拔更問嬌紅并眉白
閉門三夜淙簷雨起視溪流高數尺去年夏秋走祈崇

雲電收藏日血赤儂家倚鋤望眼穿白汗呀流地龜拆
天可問曷不遣兩龍此時會生日

謝韓幹送絲糕

玉顆瑩澈珠就磋吳鄉早杭莫計過無乃風露秀結異
移種崑崙之木木國家厨婦一百技三春九浙付重羅
銀絲千尋忽縈積中疎外潔生搓接扶桑仙蠶大如盎
線之本供織女梭恍驚萬啄關新巧胃作水茸雪網窠
即今擬形供食事纖手幻出千綯多倒甌入筯第三絕

色香兼味皆可歌周官賓祭珍饗餌有此復具理則那
詩翁物色及粃粳得此來前當見訶鱠盤漫詫金縷飣
湯餅徒夸銀線窩瓊酥玉膩信非匹胡麻崖蜜仍相和
感君汎愛記哀朽回首一笑分餘波腐儒口實長作累
饒鐘之名定不磨金山別去每掛夢老眼復見還雙摩
娑酣得飽問便腹如汝平生相負何更從公子乞方法
日當飫之老澗邁買田二頃不種秫未怕酒客來操戈

糕不用糯金
山者名天下

識村翁語

勸耕淨居村翁老而健問其壽云山居淡食乃爾昔一村叟一野僧皆壽百二

守杜郎中史丞相呼而致敬厚設而歸即逝二人壽未必止此厚味非野人所饗也其言有契

予心作此記之

山僧一生饜山蕨溪叟所仰鱖魚菽漫入侯家與相家
珍膳不應填汝腹百二歲翁清且羸茵坐鼎食寧其宜
馬知暫飽博長往穀神震怒脾媪悲官家顆粒皆民力
此祿食之須此骨兩翁妄食壽弗延當念無功暴天物
我雖不偶猶餐錢車行肉飽隸後先食功揣已懼不稱

因翁有言呼使前盤几畢識翁所言

繁昌縣感舊

繁昌古縣依山麓縣外峰巒更重複連山斷處圍平陸
有地可耕無十六昔我作尉三年畱局促似為山所囚
野行村宿飯古寺山路纔悉如吾州車如鷄栖馬如狗
風袂塵襟博升斗是時身健髮熟班頗復興懷為奔走
遠近人家山影濃與我周旋圖畫中山鳥翔集相和應
野花開謝能白紅薄宦而今更長道回頭祇覺當時好

筋骸罷憊髻推頰不歎飄零歎吾老

出郭

寒食日遇使車初甚怙
抵郊外春色慰人戲成

江縣居人寒食下少在縣中多在野哭聲不似笑聲長
麗服新粧盡遊者長郊芳草接天綠我亦行行策罷馬
盍簪命醉豈不懷卑官出入元無假偶來却勝特來好
觸處春光可圖畫幾日陰寒風用壯今朝霽景天所借
起人胡蝶作團蜚逐婦鳴鳩數聲罷天桃艷杏雖已過
郁李金沙猶未謝其餘紅白爭姱嫵醉態啼粧各蕭灑

顰風笑露顏欲語半吐梨花最閒雅游人幾許健倒去
紅粉誰家短牆亞良辰獨醒還自惜捐佩一樽猶可貫
餅盤錫飭已寒盟故人應問花應訝對春長作了事癡
不念清懽本無價會當從公謝不敏百罰深杯不辭把
魏花有約待人歸秉燭酬春期後夜

望夫山

亭亭碧山椒依約凝黛立何年蕩子婦登此望行役君行
斷音信妾恨無終極堅誠不磨滅化作山上石煙悲復雲

慘髣髴見精魄
野花徒自好
江月為誰白
亦知江南與江北
紅樓無處無傾國
妾身為石良不惜
君心為石那可得
檢旱宿香雲

香雲之山瞰平楚
松篁路窮得僧宇
明窗深室皆嚴靚
白菊紅渠相媚嫵
他日欲來坐忙迫
此行忽忽寧得所
蒲團憩定飯秋蔬
衣袂黃塵尚如許
山僧共話豈須禪
但愛茶甌如潑乳
投床有夢不能記
忽聽風林如過雨
鷄聲不二擁被溫
又恐罷驂陵險阻
出門但覺仙凡隔
猶聞窸窣堵風

鈴語今年早曠遂無年
枵腹顧天連保伍頗能念我困
馳驅兩兩致詞相勞苦
但使秋租毋病汝吾自卑官慣塵土

謝朱宰借船

宰為蕪湖
予官繁昌

書生祿邀空自憐
三年官滿囊無錢
身如絆驥心千里
安得一舸西風前
令君磊落濟川手
留滯亦憐窮獨叟
大舟百尺影白虹
借我搬家我何有
函牛之鼎著鷄肋
涓滴渠須瓠五石
劣留兩席寘圖書
輦石囊沙壓搖兀
典衣買酒餉三老
槌鼓鳴鑼人看好
相過重讀借船帖

我自盧胡君絕倒

自繁昌歸
先經于湖

田家謠

麥上場蠶出筐此時祇有田家忙半月天晴一夜雨前日
麥地皆青秧陰晴隨意古難得婦後夫先各努力倏涼驟
暖繭易蛾大婦絡絲中婦織中婦輟閒事鉛華不比大
婦能憂家飯熟何曾趨自喫辛苦僅得蠶事畢小婦初
嫁當少寬令伴阿姑頑

房謂嬉
為頑

過日明年願得如今年

剝貯二麥饒絲綿小婦莫辭擔上肩却放大婦當姑前

徐南卿招飯

徐郎陋巷四立壁乘間亦戒賓友食慈親衰鬢不供剪
定賣春衣典書冊念君治具良騷騷與渠侵早來得得
小樓十客不餘地猶勝陶翁劣容膝江西米粟絲作窩
吳國香秔玉為粒嗣宗阿戎各好士笑頡頏鄙仍婦德
老子旅寓得此飽勃鬱詩情喙三尺出門未妨雨墊巾
萬屐聲中緩歸策

再次韻

東隣客來每堅壁西隣客來常蓐食旅中一飽豈細故
偕舉大事書之冊末路孜孜食眠計外此敢忘戒在得
蘇端向我顏色好衝雨不辭泥沒膝居貧頗禁惡客惱
念子秤薪仍數粒肺可用淪米可餅併付饒啗飽君德
人謂裁詩等裁錦拙婦渠能把刀尺陶翁冥報苦未賡
搜攬肝腸閒倚策

再次韻

白晝曲肱睨東壁鷄斯空復賊糧食晚途自笑硯生埃

少日頗常韋串冊生世恐隨草木腐忍使功言兩無得
長安寧無翁艷者自宜有鐵關腰膝樂天任運時近酒
子房逃榮猶却粒求窮我者迄未知夫此誰怨夫誰德
擬訪鶯花豁襟抱門外雨餘泥一尺山陰不待興盡回
掠面東風寒策策

戲作

飲食小過不佳趙帥招
飲淡食止酒因成古詩

書生稟賦紙樣薄平日扶衰惟粥藥一日飲濕小啗肥河
魚數日煩醫治佳辰府公約把酒嚴斥厨丁預節口借問

主賓醺酢餘還許公榮袖手無厚味腊毒古不予如作病
何仍古語生世例非金石堅支離如我更可憐饒動
使諸病入冷坐亦復百憂集彭殤瘠肥本自齊此理祇
許蒙莊知筋下萬錢無足取厨薦三韭徒自苦法士語
飲應且憎何如卧客懷中醉不應婪酣任人嗤穀伯何
如辟穀高人師黃石陳遵張竦杓鑿夫何為彼此未可
相是非七十老翁誰能促戚縛此戒醉死病殂吾命在

呈趙帥

訪帥困于腰鋪次
日帥聞到招飲

雨行本自貪風便四十里程真劈箭長年攤錢夸半仙
一炊黍頃風頭轉生世快意多所辱葉舟瓠壺浪如屋
暗椿觸船船版折船丁顙天船媪哭塗窮儻有哀王孫
腰鋪人家緊閉門丁翁祿邀捕魚者向我顧肯顏色溫
茅屋新成容寄宿麻茶初熟仍見分解衣滅燭睡欲死
鄉夢醒時雞喚晨平時晨舖下南浦定向揚州聽更鼓
飛廉生憂吾敢怨薄命若為防市弩今朝河面吹細痕
竹樹不聲人駿奔掣鈴一笑話疇昔便有樂事酬佳辰

鎮淮主人開綠樽蕙蘭香前簫鼓喧一盃為我安驚魂
勝談疊疊清耳根向來憂虞無足言

山居四首

山間有好事時肯問何如束送筋頭薤鮮分匙而魚披
襟偕我飽攬髮為君梳一笑塵勞外都無病可祛

忽作斷過訪經旬閒瘦筇慵添和詩債病減灌園功石
鼎裏輕碧庭柯零碎紅竹君如見慰竟日嘯窗風

鳥息我亦倦行行取徑微石稜妨錯足藤蔓每鉤衣森

木谷天籟連山同夕暉推門吟袖冷滿帶野風歸
涉世慣多還還欣愜此心鷄孫當歲稔竹母值秋陰言
配香秔軟行須綠影深繼今摩腹去風日更蕭森

香雲寺

山月明空隙庭柯下槁乾沉沉僧夜淨漠漠鴈天寒夢
境愁偏隔詩情老易闌未容辭水厄聊復踞蒲團

圩上

小村山影裏山脚水明沙春事初移柳人家未摘茶生

兒了門戶饌客有魚鰕笑我塵埃者奔馳鬢易華

丁酉道中暮春

去家如昨日節物轉頭非風處綠自舞雨餘紅頓稀野
橋平水過村路躡花歸趁得酴醾在箏琶拂舊衣

得姪消息

甚喜年穀熟仍聞佳食眠郡人新過此鄉信得真傳社
酒浮蛆淥湖魚割玉鮮平時計安穩莫靳里胥錢

金地寺

側徑崎嶇去飛蘿次第捫山橫欲無地路轉却逢村竹
栢園荒寺莓苔上繚垣殘僧不知客芋火老雲根

陪盱眙王使君東遊四首

錦席浮波影牙檣轉霧霏飛花窺碧酒舞蝶傷紅衣野
日歌前淡雲峰望處微游魚應與樂啼鳥莫催歸

纜解鷗飛處船移柳影中林廬桃李月浦淑蕙蘭風酒
淺能無醉歌長惜有終賦詩聊泚筆寓意未須工

紅旗圍皂蓋離筵碧山隅水色涵雲樹賓筵著畫圖香

溫金鑿落花亞錦屠蘇醉裏銀絲鱠漁舟不待呼
風林山闕處茅舍兩三家小駐回鶻隊重尋粟玉花疎
煙橫暖靄碧溜漱晴沙野興未渠盡數峰明晚霞

都梁

淮汴朝宗地孤埤只眼前譙樓西日淡戍鼓北風傳破
竹非無計澆瓜亦自賢客愁渾幾許撫劒倚吳天
天外纖雲盡山巔望眼遙平淮剪綠野白塔界晴霄客
裏風光異吟邊物象驕功名它日事回首興蕭條

關塞淒涼處青徐指顧邊如何漢正朔不盡禹山川將
略輕三捷天威重萬全諸公不愒日老子判留年
路惡惟沙磧山回忽市鄜樓臺明晚照花竹暝寒煙生
事知無警懼聲驗有年猶嫌武陵遇不載割淮鮮

犬吠蔥青裏人家竹徑深短籬循石磴老屋枕煙岑
瘠知春事鳩啼認晏陰豐年易為客盃酒慰幽尋

年年漢臣節春鴈與同歸番俗尊華服皇家後武威市
中斜甃賤水外拂廬稀南北皆生息和戎果是非

雨後病起

小卧竹間齋幽懷得好開
病從涼後減雨及望時來
雨
廬山千疊諸雛飯一杯
吾生計此耳無夢到燕臺

客中

多夜淮瀕夢言歸未有期
愁禁客舍雨寒過杏花時
酒
廢無何飲春如不自持
若為丹九轉能黑鏡中絲

次瓜州

雲曠平山塔煙明老漚城
客行判費日舟泊細論程
聞

水清兼濁潮天雨復晴未須歸有夢午枕愜涼生

贈趙秀才

袞袞紅塵去扁舟得挽回半生障日手一笑沃愁杯應
俗吾衰矣論文子壯哉明年日邊信滿冀好懷開

定海

齒髮今如此東來料一寒愛民平日事宰縣昔人難稍
得官租辦聊容坐席安渠儂趨負輓疑未厭兒寬
官解鹽煙外居人雜賈胡聽言須畫字討海倚輪租

俗何妨陋鮮肥頗不無已廿三載住疇昔計乘桴

聞師文過錢塘

九堰三江外欵帆側拖頻海鮮常人筯雨鵲定隨人椒
酒須分歲江梅巧借春團樂多樂事徧賞物華新

官居

官居不惜日宰縣動三年忍事腸欲爛為防頭救燃不
應一飽計長受衆人憐俛仰堪供笑人間海易田

送學生歸赴秋試因省別業

年事真無賴官曹已憚煩
兒堪付門戶吾粗有田園
遊舊因相問襟懷為細論
此心歸隱計日日受風幡

食口幾鵝鴈田收問菜麻

子美力難及黍稷得種菜與麻

寧堪再攢減

淮人謂歲飢為年歲攢減

又抱兩嘔鴉

越人以嬰兒為嘔鴉

投老憐漂泊何時

了貸賒終慙陶靖節歸不計生涯

高頭山

小駐緣雲脚居然睡眼醒
楚天銜樹濶漢水挾山青
蹠踐初忘倦巉巖已飽經
川原方啖蔗不擬嘆漂零

無題

薄宦受風梗還家歸岫雲
行人與喬木老色竟平分
末路慙周朴窮交有墨君
看渠綬若若千騎詫鄉粉

書懷

俛仰人間世纔為一笑資
百年羊腴熟萬事虎頭癡
文字聊遮眼功名浪朶頤
浮生如此爾况復病餘衰

次韻楊宰次郎裴

時予亦留西鄉因述懷

信次尚村落食眠隨曉
晡山瓶餘瀝倒村人以野釀名瀝倒
僧宇

謁伊蒲笑挾兔園策問收魚澳
租前灘起漚鷺為我作
前驅

次韻楊宰葫蘆格

生常信流坎老不歎漂零
雪後菊未死雨餘山更青
仍煩析塵語遠寄打包僧
政續隨詩價多君日日增

次韻張守塗中逢節

向子房州之行亦舟中作歲節飲

塗中歲適盡江影暮澄凝
栢酒惟宗武河梁似李陵
問津田叟傲捩柂長年能
繫纜纔沙觜人家已上燈

次宿北阿韻

聞道藍輿去遙岡復近阿詩應吊孝逸碑或贊頭陀靜
者官糊口公朝禮作羅憐君日阡陌塵土撲陰何

北阿李孝

逸破李
敬業處

即事

側徑苔竹潤短籬鷄鶩喧小停障日手聊憩卧雲村綠
影烏皮几新醅老瓦盆平生農圃計重與野人論

再用韻寄丁知縣

南樓酌酒未分襟
啁鵲啼鳥亦好音
晴日倒紅生笑頰
煙梧搖綠漲盃心
可堪歲月供行色
盡把江山博醉吟
不繼蕪湖留十日
焦峰浮玉恣幽尋

丁為蕪湖薄留予
必以十日為約

念衰

心意彫殘底自娛
每臨清鏡笑頭顱
詩從多病難為好
官過中年劣勝無
急景驅秋著髭鬚
歸鴻銜夢下江湖
更應載酒高陽伴
誤輟歌呼話故吾

閒適

丁年故紙枉埋頭老去時名底用求得句蓋嘗身被謗
屏書姑免眼為仇關門工作索駝坐閱世已冥鵬鷖遊
槁木山麋真適適從來里舍議家丘

次韻蘇監倉二首

時蘇兼
主邑學

交朋又得一相如高掩虞郎行秘書妙論析微驚我倒
諸生到眼可人無一官幸此分鄰燭五字渠能攬虎鬚
快讀清篇病如掃北軒風竹對森疎

長日奔馳傳置如久妨著論與抄書逢人爭席有時有

疥壁留詩無處無
禦寇未辭躬
楚製論文常憶攬桓鬚
扁舟再有東遊便
有向朋從自作疎

縣西

一徑斜穿犖确行
身閒尤覺馬蹄輕
坡頭嘉樹千幢立
煙際長江匹練橫
茶鼓適敲靈鷲院
夕陽欲壓赭圻城
三春簿領沉迷裏
野鳥山花眼最明

寄幼度主簿

辭家暑雨濺紅渠
轉首蒼花已雪如
歲月祇隨流水逝

笑談陡與故人疎
簡書我正罷長道
歸棹君行指舊居
他日霜風吹夢破
空從旅鴈覓來書

七夕

龍旌鳳扇一相迎
知費青禽幾寄聲
天上經年纔舊約
人間轉盼便深更
涼河只向樽前落
微月偏來酒面明
後夜玉琴彈別鶴
獨應乾鵲夢魂驚

復程平叔

早歲雄文手自編
偶同聞喜聽鈞天
漫為官去吾何取

肯寄詩來子定賢
潘岳自憐頭易白
士安況苦病相纏
羨君身健須如漆
萬里亨衢穩著鞭

夏夜飲客

矻矻官曹興易窮
得閒何惜一樽同
傍愁邊到無惡客
從竹間來皆好風
勝日詩狂輸酒聖
轉頭渭北復江東
雕鞍未作扶携去
更放蘭缸子夜紅

寄陳居仁

尚記誅茅柳外隄
水光搖霧潤窗扉
桑間曾是僧三宿

海上能忘鶴一歸野店樽罍醅脚醺比鄰雞鶩稿頭肥
解顏一醉平生事更向行藏計是非

贈仲國美

前年春國美
亦留夜飲云

三閱春光一建瓴依然歸棹泊危亭烏迎客子各頭白
柳學故人俱眼青曾是縱譚僵婢僕又成豪飲卧罍瓶
明朝小話前溪別分付溪風管醉醒

贈趙秀才

平生心事釣漁舟解后青衫映白頭肯為功名戲雕虎

不留顏面對沙鷗露漙青蓋高荷曉風約黃陂小麥秋
入眼斜川歸趣好此身何處不菟裘

京口呈張閭學

歸懷未用話南園卧治于今又北門但息兒啼寬上意
小稽霆擊取中原虎頭銳視非無種獅子當觴且勿喧
更恐譚公家世事斷無宣勸定驚魂

時迂北客故云

約二同年遊虎丘

蕉旬閉戶耐寒威起視晴空碧四圍黃鳥啼邊忽遊子

白龍去後漸單衣年時尚記尋芳約老境仍憐得醉希
紅影幽香虎丘路杖藜携酒莫相違

次韻張丞二首

夫君腹笥盡奇謀每叩談鋒聽不休誦賦久嗟無此作
薦賢端合拔其尤小遲榮路觀掀趲聊為同寮蓋謬悠
政恐諸公有推挽平時果藝仰由求

槁梧間據自沈吟投老真成負此心酒沃渴鯨悲事往
官隨跛鼈笑吾今進為終愧周人朴歸去曾無陸子金

尚賴君詩慰牢落時清聲曠發純音

即事

江漾晨光入縣門樓斜晚影到漁村海聲不為無風靜
山色居常帶霧昏問俗即今防愒日來時撫事錯銷魂
浮生寄寓君恩重未覺天涯異故園

勞農淨居贈皎啓二僧

勞農今喜復南轅夾道扶携亦笑諠縣尹庶幾無疾病
山人迎送耐頻煩
筆葱湯餅聊堪飽出瓮春醪半帶渾

惟有為民真實意異時陳迹付公言

九日登樓

海上重陽率多風
雨邑寄罷飲作

縣曹逢節猶忙迫陰雨乘秋每接連
九日歡娛異前日
幾年晴霽有今年
湖山入座塞珠箔
萸菊接香薦
玉船
帽委西風判一醉
故人應未笑華顛

再次韻謝張守得新居

得巢歸翼愜卑棲
尚卷風茅落凍泥
病樹緣階旋培植
舊書堆案細籤題
地非新野聊龍卧
人似東屯賸客迷

身世只今供冷笑百川東注月行西

對客再次韻

客來一笑同鄉味便粉秋菰刷藕泥糟浥子薑仍舊法
籠緘乾笋儼新題白魚紫蟹空濡沫窘兔驚麋想碣迷
自揣臞儒合蔬糲放麋終恐愧已西

自適

渺漭湖天入短蓬心期祇許白鷗同人言火食間蓬客
自命官身田舍翁酒可銷閒時得醉詩憑寫意不求工

更那長日溫書眼一送蜚鴻下遠空

雲水為家百累無意行從昔畧方隅飲忘醒醉狂常爾
夢到無何午未蘇遺俗可辭翻鞢錯付渠陰作負舟趨
說說禮法工相晤閉戶仍防大小儒

登平山堂

平山堂上命琴樽前輩風流肯見分戀客嬾斜當檻日
藏山不斷隔江雲吟牋得意窺天巧醉面禁涼減纈紋
杖策歸來新月上落梅如雪點風裙

春日客中

平時漫說醉為鄉，對景今如石作腸。
老去猶興客中歎，春來剛制酒邊狂。
露桃煙柳為誰好？蜂蜜燕泥徒自忙。
紅紫打圍歌笑地，暮年多感怕思量。

山行寄程帥

雨餘支徑濕平沙，恰稱卑官下澤車。
雜樹暝煙森立槩，亂峰迎客儼排衙。
水禽時弄翩躚影，野草爭開細碎花。
久憶山行此如願，不應回首更思家。

次日再次韻

鷗雙鷺隻傷汀沙却滙沙汀過客車清吹解撩叢竹嘯
高山如受衆峰衙寒生碧澗懸魚網潤著蒼崖騰土花
所惜隔牆紅紫滿行行無暇訪山家

復次韻寄程帥二首

節物匆匆可挽追直須樂事趁芳時行春脩喜花圍屋
借景何殊月在池

南昌當官借景未妨
民恰似鑿池取明月

對酒不無桃葉

女扣舷却笑木腸兒山家有約須重到定放遊人張水

嬉

人家襖袂競攀追
刺史春遊正此時
羯鼓聲中花作錦
壺籌多處酒為池
絕須絲竹娛安石
勝有篇章付雪兒
聞道續貂容下客
老無佳句坐荒嬉

騎過山村

煙村面勢枕蒼山
一徑循山作屈蟠
入望高幢羅翠密
掛空匹練喫清寒
吟髭撚白迎風去
粧面駢紅倚戶看
頗似騎驢后山老
倩誰粉墨灑毫端

寄鄉中親友

棋酒游從歎離羣
酒牀吟筆漫飛塵
潮乎可奈才力老
甫也尚為南北人
安信不隨秋鴈到
流年修復野梅新
南岡北阜憑高地
引首吳天幾愴神

再用前韻贈高司理

吾宗如此況他揚
碌碌諸雛欠肯堂
薄宦幽憂殊未醒
故園歸夢可勝長
盃盤頓頓家雞嫩
翁媪嗚嗚社酒香
猶記比鄰笑行客
夏畦龍斷為金章

上巳溪上燕

杜若洲邊卓旆旌佳晨一醉萬金輕春光僅有一分在
天氣可能三日晴解道蘭亭亦陳迹肯吟楚些愴幽情
人生到處皆兒戲笑看爭標鬪兩鯨

再次韻荅許節推

新釀開缸綠蟻浮舊辭仍缺唾壺謳宦途要處難插手
詩社叢中常引頭倒載肯陪山簡醉反關莫厭孟公留
秋田粗可供佳客不比封君亦素侯

書懷

人間窮達命污隆作意功名欲捕風但見劉班誤車子
何曾鄧禹笑王融官曹得飽餘何事書課乘閒亦雋功
少待尊鱸付張翰一溪風月放船蓬

再次韻謝高幾宜惠詩

小家茨竹即為堂暇訪深林索豫章平日牀頭但周易
看人筆落便靈光庠隆賦質嗟多樣良楮論材要當行
莫向黔婁問奇貨長沙舞袖可能長

歸歟老秋

已辦求田問舍謀登臨那復更悲秋蟹肥與客爭先把
稻熟催兒徹晚收霜後峰巒添峭削波間鷗鷺劇風流
寰中勝處天應惜付與癡兒祇暗投

宿何人家

步尋松篠款谿筇忽到孤山處士家十頃蒼鱗漾墻角
一鉤寒玉挿簷牙杯行不乏紅絲鱠飯了仍供白露芽
把臂傾舒吾已怯又分離緒上歸槎

凌晨張司戶惠詩次韻

小駐江干接雋遊，渭清涇濁可同流。
假真笑我陳驚坐，造妙推君趙倚樓。
姓字已高時輩上，功名尤忌鬢毛秋。
等閒莫學金華伯，碧水如天擬夢鷗。
山谷詩夢作白鷗去江南水如天
仕塗決矣息交遊，姑向林泉訪勝流。
短褐直甘乘下澤，異鄉終勝賦登樓。
驚心夢境檀槐戰，屈指鄉園秫稻秋。
雉翳龜焦緣有用，未聞金彈中沙鷗。

西林訪銘師

師頗能詩

天將宿雨淨春空却著湖山鼓吹中
載酒言辭藉花伴
運斤來看斲泥工
前身師定參寥子
拙宦吾今張長公
俛首人間皆長物
未妨分饗北窗風

夜宿商卿家

復用過
字韻

荏蒲無警南塘靜
歎歲村區鼓罷過
更喜良宵共譚麈
幾煩親手剪燈花
酌無多酒仍餘味
嬾不吟詩政自嘉
蝶夢蘧蘧纔一霎
鄰鷄啼罷又啼鴉

晚飯商卿家

用前
韻

我似長松久卧沙
迄今諫鼓夢猶搥
倚消愁斛人如玉
欲近書籤眼有花
投老無庸尚強聒
過君每肯具柔嘉
婪酣得飽行摩腹
不省饑號有暮鷄

重九山陽儀真兩使君送酒

酒會文期興尚濃
佳辰一笑坐天窮
兩州各遣六從事
九日俄成一病翁
詩不受催空急雨
帽無緣落任西風
明朝晴徑通行屐
却漫枝筇遶菊叢

次韻高賓王見投

殘年病眼苦眵昏盡屏甘腴誓綠樽龍樹難逢刮膜手
孟公顧有獨醒孫頗煩十吏供揮掃無奈諸峰役夢魂
友義惟公記衰疾新編肯到崔羅門

病念還家可奈愁客中日月急梭投土花暈壁迎梅雨
海燕將雛送麥秋霑袖正憐珠隕睫關門能復玉為舟
揩頭閣膝高春卧黃妳青奴共此樓

再次韻自詒簡賓王二首

魚磬清澄鳥愛昏陶翁歸計酒盈樽山田雨足鳩呼婦

籬苑春深竹有孫
百首旋編新賦詠
三生猶憶舊精魂
小摩他日紅塵眼
閒送蜚雲過海門

庾郎胸次枉堆愁
馮衍才名迄不投
歸去來兮歲華晚
末如何矣鬢毛秋
令威心事千年鶴
張翰生涯一葉舟
回首月堂金谷夢
却憐海蜃結飛樓

次張學錄韻

燒香為后山展像
拜太虛誰能作九
原候蟲弔寒墟
臞鴨久欲忘食蛙
近亦稍人言淮浙
殊得飽不汝較

再次贈張學錄韻

李蔡下中爾萬目指騫騰何蕃頭欲白秋窗耿青燈
張子携詩來危坐撥芋火三問笑不對政恐非助我
次韻錢倅諸公睡香花

釣窗玩孤芳殘月衣上明紫囊拆蘭麝小風弄初晴
泊上虞驛來日行

梁湖莽蒼外後去未云遲縣市容吾戀江湖不汝期

早夏

安石榴花猩血鮮涼荷高葉碧田田鱗魚入市河豚罷
已破江南打麥天

滿地榆錢未掃除畫簷忽復燕將雛風窗夢破搔頭坐
重課兒時讀了書

題趙秀才壁

日日危亭凭曲欄幾山蒼翠擁煙鬟連朝策馬衝雲去
盡是亭中望處山

謝兩知縣鵝酒羊麵

僧樣齋厨冰樣官
饑憑脫粟食無單
不因同里兼同姓
肯念先生苜蓿盤

次兩知縣韻

老去棲遲八品官
劒頤深悔誚田單
東鄰未省吟髭斷
笑擲牙牌命肉盤

寓吳門

張監留居平江率趙守
袁憲月助桂玉費作

溪翁園客問何如
可諱浮生百計疎
不憚典衣規得酒
長因乞米銜能書

興闡猛輟凌江棹重看鶯花茂苑春歸自乘流留亦好
浙風淮俗總宜人

紹熙壬子勸耕妙勝

桑條麥隴接比鄰社酒家炊丐路人風俗尚如它日否
憑誰細問故園春

定海甲寅口號七首

長官清苦舊傳聞檢放禾苗近四分畢竟不緣胥吏手
旱頭科斂枉紛紜

田租有約不相違比着豐年數已虧一飽分明郎首賜
幾曾刺口問抽卑

已抄口數報隅官歲後朝舖定不難且願眼前彊健在
赴坊討海過冬寒

水泛溝塍意欲饜凌晨還復雨廉纖早秧未領其感切猶

須插晚穀無多不更埤

直廉切

父子分頭上海船今年海熟勝常年官中可但追呼少
不質田輸折米錢

人家兩兩捉春歸
笑語相過復歎咨
共說颺頭前夜作
幾人蒲網罟流尸

連宵飛雨喜滂流
已入梅天過麥秋
二十年前如此晚
金城地抱却全收

謝張德恭送糟蚶

德恭師
文友也

壓倒淤泥白蓮藕
半指介甲露穠纖
玉川水厄那知此
急具薑蔥喚阿添

慶元冬再到盱眙

虎頭山下參天柳親見栽時共我長柳自摧殘人自老
半生不抵熟黃梁

日行犂确面孱顏舊慣山居意易闌見說煙雲暝峭崿
北人爭指畫圖看

閒居

營隙地頗事栽種隨遇作
一詩前後不同故無倫次

雪雲脫壤漏朝陽風物橫前引興長紅糝紫蕤今次第
遷鶯來燕費商量

種桃接李不辭勤旋作花前把酒人羨殺文禽映花語

飛來趁得見成春

春來敢自貸衰慵
正要檀欒間白紅
愛竹少留枝策徑
灌花分破著書功

步屨歸來未覺勞
迎門喧笑問兒曹
笑翁渾似魚千里
小圃周圍日幾遭

客夜不寐

陣鴻輾轆上雲衢
夢欲成時每破除
少睡更堪寒夜永
新來熟遍少時書

江行

帆桅飛去劃空明
人倚東風兩翼生
世事快人如此否
日斜三百不留行

到房交代

簷外浮嵐暝翠堆
道人親眼為渠開
食錢官簿何須計
直為南山亦合來

復次韻

昔上瞿塘灩澦堆
盤渦如井放船開
山行歡喜今非錯

備見梢漬擊漩來

地有錯
歡喜山

十里髻鬟誰綰結
半天蒼翠自嶙峋
教兒莫憚依山住
濶領裁衣盡土人

題驛舍

客到淮鄉話楚鄉
長將天末指襄陽
如今漂泊君休問
又過襄陽十舍彊

房陵十首

似聞僊伯厭乘龍
常混紅塵市井中
靚面未須趨避我

褰衣無計跂尋公

房人謂巧避云起避力尋為跂尋起七靴反跂音數

陰晴未敢捲簾看苦霧濛濛鼻為酸政使病餘剛制酒

一盃要敵滂朝寒

晨起霧久乃開土人目曰滂朝

祠壇歌舞雜嗟吁下酉猶濡上酉枯誰謂朝來一拆雨

歡聲已覺沸通衢

潞水溉曰酉得雨曰一拆雨

竹屋高低正復斜蔚藍影裡著人家底消山峽三分瘴

爭課盧仝七椀茶

土人晨飲茶云勝山嵐氣又曰房三分瘴

夏田少雨富來年多雨何妨穡事秋已戒日供皮子麵

更教晚稻飽霜收

麵皆塲不塲者曰皮子麵
稻待霜乃收曰飽霜米

跨牛待得夕陽回在處諸嫵笑口開已借蠟錢輸麥稅

免教緝捕闖門來

弓手下鄉
目以緝捕

杯酒清濃肉更肥咸言趣社極歡嬉丁寧向去坐年日

要似如今歛脯時

年日飲食曰坐
年社日曰歛脯

農閒間里有逢迎白飲傍邊骨在羹老稚不妨頑過日

邊頭難得是升平

俗謂戲曰頑
羹曰骨在

刈罷秋禾未敢慵更須趁逐過殘冬城中竹筴今年貴

鹽茗新來免闕供

膏枯竹供費曰
竹笑吾乃切

翁媼同圍老瓦盆
倒瀉新酒雜清渾
視南視北皆春社

且放烏犍卧晏溫

村落所
聚曰視

春寒

掃雪堦頭曉未乾
東風作惡鼻仍酸
西園點檢江梅後
祇有櫻桃不避寒

稍稍春光到眼中
衝寒試與小檣筇
杏花已尾櫻花拆
正要深紅間淡紅

清明寒食經旬是笑問風寒更幾餘小杏惜香春恰恰
新楊弄影午疎疎

平明欲斂雲復厚薄晚未休風更顛老怯春寒不宜出
下帷添火擁書眠

不寐二首

改變年來所著書依然幽夢隔華胥寒更何與衰翁事
數到掄揆殺點餘

追思可樂是丁年日力孳孳有食眠頭觸屏風紙燈後

慈親笑勸掩陳編

寄張守仲思

一思交好一悲悽
楚嶠吳山夢到迷
怕說萬山天樣遠
房陵更在萬山西

四月望再遊西湖

春光陸續委東流
看到湖邊安石榴
更與蘇堤鷗鷺約

辦舟來賞牡丹秋

俗目芙蓉
秋牡丹


吟詩自笑

文字光騰萬丈長錦官老杜豫章黃投荒忍死經人鮓

討飯充腸上岳陽

南昌詩云我雖窮至骨猶勝杜陵老憶昔上岳陽一飯從人討

宋詩鈔卷三十七



總校官庶吉士臣張能照

校對官庶吉士臣陳墉

謄錄監生臣吳魯

欽定四庫全書薈要

集部

宋詩鈔卷

三十八至
四十

詳校官候選知縣臣吳國華



欽定四庫全書薈要卷二萬二百九十一

集部

宋詩鈔卷三十八

內閣中書舍人吳之振編

沈遼雲巢集鈔

遼字睿達以兄邁任入官為審官西院主簿出監明

州市舶司遷太常奏禮郎改杭州軍資庫攝華亭縣
事奪官徙永州元豐八年二月卒於池州遼畜聲伎
几研間陶瓦金銅物皆閱數百年遠者溢出周秦

王介甫贈以詩云風流謝安石瀟灑陶淵明其子雲
亦有詩云前日覽佳作淵明知不如及徙秋浦築室
齊山名之曰雲巢一洗年少之習從事禪悅蘇子瞻
嘗語人曰睿達末路蹭蹬使人耿耿求此才韻豈易
得哉余閱其詩間出入俗調佳者亦生硬排奰不知
何以諸公見賞之如是也悉為汰去庶諸公不為失
言耳

寄陸九

賀老湖邊春水生野陽浮動北風輕
天邊重鬪歌筵響
鑑裏綵舟金翠明大抵盛時須著意
要知吾輩未忘情
君如彥道能懷帽便逐輕帆作此行

寄才仲

陶令在彭澤放懷天壤間橫江三百里
往往向廬山多
尋簡寂醉時訪遠公間不復顧吏迹
世人指為頑公子
負文華少年成青綸風流不屑俗為邑
得星灣節節香
廬峰據案見蒼顏何勞事舟楫緩步
可躋攀形骸付物

外勿使人事關巖壑高世人有誰偕往還新篇定盈軸
佳句不可刪南風儻垂寄誠足慰衰孱

贈磻翁龍尾硯

龍尾山盤八十里龍尾有潭下無底秋月亭亭潭氣黑
其中有石色如墨山川秀氣散不為風雲頑不為砂礫
融結至寶有物主水上經營無處所經年始獲不敢賈
我昔游江南有客遺我誇龍子吾知龍能變化是或不
可制追琢為巨硯大筆揮離騷中圓體天形外方作地

象精光熠熠角生浪熟視乃有紺羅文瑩潤無與比玩
愛何可論我今樗散無所事特贈華陽鴻筆麗藻人吾
聞蜀都多學士置諸文府為戰具君如窮經遂絕筆請
與大軸傳後嗣

春日行

宮梅撲地白氍毹細柳結煙金縷繁春華年年來不已
人生七十半衰殘少時豪放猶不敵何況羈棲落荆蠻
囊中琵琶金鳳閒古曲情深屬誰彈病目矇矇對荒山

東風有意為掩關棄置萬事一夢還江湖水深愁夜寒
甲辰年五月十五日夜澧陽觀月

少年悵不樂明月何為哉揚眉一遐賞寂寞更傷懷念
昔吾州樂泛舟湖上來佳賓適所好歡計成金罍妖歌
有送響度曲清且哀留連夕陽下夜色起山隈光明水
晶域素彩中天開龍香弄微風四顧絕纖埃澄波照上
下倒影出瑤臺紅燭漸向微始知夜漏催美人屢更衣
含笑玉山墮歡樂殊未央鼓枻中洲迴人生無憂患遇

樂且銜杯悵余失交臂萬里來天涯羈愁那無感情
慮長如灰神遊忽自笑安知顧形骸

贈大中鎮國長老

昔從東南來稅駕依金地迎風步峻閣始眺灋陽市蒼
茫煙霧下一水縈如袂磊落雜連峰精廬遙相峙宅土
信羈客杜門忽彌歲風雲一蕭散身世兩無累懷歸悵
有感史遷念留滯引脰企昔游野馬埋蒼翠何時籃輿
去復將老師住請掃巖下石為述空王偈

遊瑞巖

已恨初年不學僊
老來何處更參禪
西風搖落歲事晚
卧對高巖看落泉

寄四明神智師

甬水樓頭看盡山
南城寺裏扣禪關
老師多事猶相記
千里馳書慰病孱

次韻酬明發華宗

長卿倦遊欲東還
幸與諸公俱出關
世事轉頭都委夢

人生何計得長閒
殘花爛漫飄村塢
細雨廉纖隔碣山
誰寫熙寧十才子
老夫亦入畫圖間

唐有貞元十才子
出關圖至今多有

本傳

奉陪穎叔賦欽院牡丹

昔年曾到洛城中
玉碗金盤深淺紅
行上荆溪溪畔寺
愧將白髮對東風

龜茲舞

龜茲舞
龜茲舞
始自漢時入樂府
世上誰傳此樂名不

知此樂猶傳否黃扉朱邸畫無事美人親尋教坊譜衣
冠盡得畫圖看樂器多因西域取紅綠結裯坐後部長
笛短簫形製古雞婁揩鼓舊所識饒貝流蘇分白羽玉
顏二女高髻花孔雀羅衫金畫縷紅靴玉帶踏筵出初
驚翔鸞下玄圃中有一人奏羯鼓頭如山分手如雨其
間曲調雜晉楚歌詞至今傳晉語須臾曲罷立前廡歎
息平生未嘗睹清都閬苑昔有夢寂寞如今在何所我
家家住江海涯上國樂事殊未知王顏邀我索題詩他

時有夢與誰期

寄文翁

白兔觀邊僊路長華林脩竹到南莊
比鄰雞犬易過屋適意琴書動滿牀
目斷鵲鴿分漢節心隨鴻雁極天潢
欲移畫舸遙相訪正恐田家五月忙

奉酬舜文即次原韻

我生無庸如斷絡已分老死填溝壑
不能掉舌強附會何暇論經更穿鑿
萊蕪甌敝欲生塵玉川婢簾常赤脚

世間要途不易驟身外名疆何可縛本無道義輕王公
亦不悲傷念流落水鄉夏半不言熱繞舍新篁尚含籜
訟庭勾釘非吾事吏按煩苛都可却農民漸使安畎畝
和氣終須蠲疹瘼子羽不肯過我室懸榻何妨卧西閣
年來多病亦廢飲牆下度泥委杯酌舊學迂疎不適時
譬如石田何可獲欲捕大鵬逐方嶠終不勞心事弋繳
行當歸掃烏峰下試煉金鼎長生藥

題楊師壁

年來病勸厭尋山且寄清泠白水間最愛楊師舊茅舍
頻來借榻伴高閒

寄慶復允中

木葉飄蕭已半殷試臨高處望君山野田繚繞來時路
畫舸逍遙數日間坐想故人應見憶如今禿髮不勝斑
兩州相望無千里莫惜新篇斷往還

贈清道

少年好書老彌篤牙籤錦囊數百軸江左墨妙世不矚

有唐諸公粗可錄諸公草法無可稱中葉始有張顛名
張顛下筆有神會其妙不似點畫成後來沙門有藏真
措意瀟灑尤更精當時二子最名盛至今學者皆服膺
本朝蘇公名弟兄汝南蒲陽亦有聲比來諸公已老死
其餘卑俗類可憎我昔乘興遊都城列子示我新素屏
始知無擇得此道長沙道人今復生歸來窮巷拚柴荆
惠然相訪得忘形贈我數行豈無意勢如九河注滄溟
中間龍蜃降沒升歎伏不暇獨可驚自欲何能謝言情

欲贈金玉還愧輕慙勤之揖喜不勝使我區霧老後明

池陽

池南柳色未全黃
池北萱芽尚帶霜
老去尋春不嫌早
春深留與少年郎

寒煙寂寂鏤青谿
圓月亭亭上曲堤
小杜風情遙可想
閒調絲竹舞金泥

林平

河邊柳眼澹煙浮
臘破春歸一歲休
不復昔時羈旅恨

黎明還泊北城頭

次韻和宋平

憶昔銜杯折梅處孤山寺前千丈塘橫遮青林鬪殘雪
暗入紅袖留清香往遊都城雖屢賞縱有素艷終殊芳
莫辭遶林行百匝更嚼嫩蕊薰愁腸

和張寶臣即元韻

始余倦遊念還家一身泛然寄天涯頭上白髮日益加
朱顏不駐爐中砂飄飄逸氣凌紫霞猶著黃綬趨泥沙

烈日謾憑烏帽遮窮巷歸來夕煙斜閉門正欲謝喧譁
何憚屋室多痺疥楊柳欲落鳴飢鷄八月秋風想乘槎
市中有金誰攫拏自欲歸耕老菑畬嗜好已背梨與楂
那復開口增訕訕眼昏白晝生黑花老悲獨向兒女夸
枯轍不能活鱣魴騏驥垂耳伏鹽車一官欣得飽魚蝦
頓首致謁辭當衙愚拙不遇何復嗟川洛舊遊殊不遐
才渡楊子已聞哇吳女蓬鬢多髦髻西湖信美謝若耶
松竹夾道繁根芽勢利屈曲如盤蝸衛青變化乃龍蛇

深閨召客舞雙髻撫手相勸競呀呀西崦老師自煮茶
太守陳樂奏渝巴湖水洗面去塵痂故山白怕留文沙
田裏小兒放猪猡為樂往往鳴簫笳亦有狐兔怛怛置
令人指手徒為柳賤職馳使告及瓜聿來甬東絕紛華
箝口不復露頰牙聯曹相係瓊與葭上官庇覆不汝瑕
優游重見林中葩四時風露換物華新詩迭致思無邪
吾子俊拔誠可嘉豈獨鄙言數驚誇高吟大字耀紙麻
時雖未亨道不汙屢出珠玉能愧奢麻姑手爪幸見爬

長篇垂況理不差正如矛戟相鏖義

走筆奉酬正夫即次元韻

樂府古有行路難但悲白髮憐朱顏時命多向賢才慳
詰屈不平萬世間壯心欲馳步輒跚試出鋒穎官已瘝
中心忽忽惓且煩不如歸去江海間要懸大刀數撫鑱
何陋九夷與八蠻自顧鄙性疎且頑誰能隨時事黠姦
從來多病筋力孱正當落魄卧深山敝廬數椽粗可跽
安居里巷鍵重關終日無人踐茆菅冠帶不修衣袂黥

高歌一曲舞雲鬟比鄰有酒時見頒春風秋月與我閒
夜靜佩玉鳴珊珊高人逸士或往還蓬舟自訪來前灣
行歌紅藥與香蘭已增俗物近塵寰一身蕭然念早鰥
髭鬚憔悴半已斑誰能更問禿與鬢且聽溪水聲潺潺
強來為吏腰少彎幸讀君詩錦繡篇相望鬱鬱何可刪
君豈久居五兩綸

次韻酬李正甫對雪

苦寒冽冽日夜增朔風軒軒勢相凌遙山頑碧空峻嶒

高堂閒坐擁敝繒欲醕一杯意已仍結歌黃竹但伏膺
愁雲漫漫四方騰海氣上薄初不勝雪霰雜下風作稜
漸著弱柳頭鬢鬢半積軒砌發幽層枯樹兀兀愁飢鷹
紛然不已失溝塍一飲一斗心易矜試步薄冰猶戰兢
圓圭方壁降復登憶昔前年正嚴凝攝事大蜡清晨興
平生看雪實未曾健僕俊馬半醉乘或前或後望交朋
不辨明河與玉澠烈火萬炬氣不蒸被面唯有凍與冰
歸來心目如水澄喜看道傍劔作燈豐年為瑞古有稱

凍死何暇談鄒滕欲邀君飲恨不能相酬莫問準與繩
詒隱者

訪我維摩室不值香積飯開囊出黃粟為汝林中鑿軟
語少稽留青蔬亦易辦勿言方外趣我汝真如幻

樂神

夷人事神正自曠山頭水邊與神樂大巫龐衣手搖鐸
羣兒伐鼓更鳴角青山歷歷神欲歸湘水灘灘日脚西
小大酣歌向山棲神羹滿盞均汝釐

日落

日落沙頭山已昏
飢烏投暝下前村
誰云野客無多事
步出林間自掩門

棗花寒

山禽哺鷦半欲搏
坐想葛帔臨風湍
數日陰霖復未暢
不知更作棗花寒

復作過商翁墓

當年不佩封侯印
後世誰尋墮淚碑
定遠將軍豈夸勇

關南常侍最能詩故人不解傳遺事五嶺猶能識信旗
墓下寂寥無鼓角秋風獨向白楊悲

蒼頭已作歸來曲不信全生庾氏碑疑有史官爭立傳
終無嗣子與聞詩後房已閉千金妓私廟空收五采旗
聞說詔書優贈典孤魂應結九泉悲

鈞母潭

余讀子厚書始聞鈞母潭榜舟西江下振步愚溪南高
下凌山阿松篁蔽秋嵐土人識其地古木森梗楠水深

日波瀾此理亦易探古木為鈎母土音正相參所記或
不然信書殊未甘此公廢已久山水窮年耽造化毫楮
間浮實微相鏃幽心有默識西歸助清談

贈廣祐上人

不入四明路侵尋已十年葛藤論往事蟬蛻想蒼煙松
下數株石巖前千丈泉何為不肯住芒屨更參禪

奉簡莘叟

紅葉飄蕭秋後山相望止在一嶠間老夫無用方安命

夫子何為早閉關世事不隨歌吹樂此身略與水雲閒
經年不見寧相外在區區事往還

火星巖

火星巖下石峻嶒殿閣相望止一僧莫問人間興廢事
門前流水几前燈

侯灘

江流激激過侯灘更上山頭看打盤百歲老人親擊鼓
城中憂樂不相干

踏盤曲

湘水東西踏盤去青煙白霧將軍樹社中飲酒不要錢
樂神打起長胷鼓女兒帶環著縵布歡笑捉郎神作主
明年二月近社時載酒牽牛看父母

過商翁墓

征南名地蚤相知老向瀟湘看立碑壯節獨馳南嶠事
古風不括故山詩愁煙半鎖黃茅壠部曲誰尋舊將旗
遙矚蕪江想靈氣孤雲落日不勝悲

湘中宿臺步寺

湘源初甚微，屢挹不滿缸。比至臺步虛，泛泛為長江。虛
頭市初集，魚豆皆成椿。夷獠不識人，笑鬻龜與厖。綠荷
竭苞苴，人散誰復撞。鷗鳥亦來下，酒旆停空杠。我來憇
桑門，竹戶映蓬窻。夜寢那可寐，江流正淙淙。

泛舟上湘口館

瀟水漫南來，湘川趨東下。二水始相會，清濠不相藉。山
迴石瀨出，木老脩煙嫁。泛泛白蘋洲，林風媚如畫。宿昔

感騷憤幽興遙相借不謂垂老年羈孤窮山舍潮來刺
舟去孤月臨清夜安得跨鯨魚不復人間化

禪僧巖

瀟湘山水窮欲徧最後乃得禪僧巖禪僧成道久已化
獨有崖崿青巉巖降身入洞不甚險突兀三室誰雕劖
東西有道若蛇竇白雲暮暮門無緘持火旁行不知際
七穿八竅遙相銜涓涓乳泉白如雪由來此地殊仙凡
主人引我復深入行止嶼穴尤嵌嵒中間石鼓有異響

擊拊想可參韶咸吾身久病苦下濕復畏神鬼來邀攬
直趨出洞上南巘豁若巨海張雲帆山花爛斑出竹梢
亦有禽鳥聲誦誦欲還未可復小駐日脚已過東岡杉

贈別子瞻

平生雅游眉陽客五年不見鬚已白借田東坡在江北
芟夷蓬蒿自種麥相逢不盡一樽酒故態那復論歡戚
手抱阿武勸餘漑維摩老夫失定力老夫寂寂出三湘
更欲卜居池水陽薄田止須數十畝田上更樹麻與桑

老來正苦迫生事清明雖近猶未秧罷亞若可博乾麩
以無易有遙相望我舟即行不可駐欲卜後會誠茫茫
他時有信若可寄不用辛苦為詩章

德相送荆公三詩用元韻戲為之

幽居卧山間不與世相接餘生委蒲柳滯想遺空劫德
相蚤相親顧我情未厭數枉南堤步更引青谿牒相見
亦何事坐對羣峰疊陽春始萌動煙嵐生劒缺廉纖數
日雨萬里浮塵浥赤白未殘花修穠半敷葉行招老僧

語遙矚東田饒窮崖歷可造峻流誰敢涉衰齡易生倦
幽巖就調攝德相知我憊雙眸困垂睫高詠楚公作欲
引維摩筵初聞未甚解靜聽疑可獵有如太華峰跛臂
豈易攝不知泛滄海何力施舟楫遙窺土山勝昔乃文
靖業二公雖異時名德遠相躡山川若有待風物增悲
慄未知蔡侯履孰與支郎蹠勝遊可槩見筆力方我業更
紆別後情琅琅鋪簡牒倡高必和寡排比安且帖簫箏
合古律宮羽自諧協世人所欣慕有口空嚅囁東牀坦

腹士左右參經笈為賦弈碁句璆琳吐胃腸鏘然不可
閉由來知捷捷謂如伯升勇揚兵開宛葉豈比文信君
無謀喪張靨致死在必勝甘言方示怯尾章示訓戒足
以傳芳諫後生知自勵何必捶楚挾正如嚼冰雪清冷
快牙頰我昔造公室公方任調燮辱枉淵明贈今猶秘
巾篋當時隳官去終身欣廢跼冠帶遂已捐頭腦深埋
壓肯羨冥冥鴻安知栩栩蝶心清久無夢神固安知魘
少小銳文史老大心更懾是古豈余心非今寧我愜况

復論翰墨爾來那可輒不識渾脫舞何愧張顛帖所居
養鵝雁菰蒲觀唼喋亦有藜藿畦粗充七與挾孰知名
可貴安用祿為楣無求豈有沮不動誰能嚼汝堅百萬
衆淮濱空雉堞陵陽丈五墳朱雲本輕俠百年竟何往
終當封馬鬣何必悵霜毛終向憲前鐸

德相所示論書聊復戲酬

野舍老餘生雅尚今已愜不逃世憂患餘事寄巾蹠行
尋青山轉坐對青山疊欲隨白雲去儻與幽人接盤桓

太清洞悵望長江艤昔時古錦囊今還白羽策不復叔
夜煅真得孫登攝九華一枯藜青溪一孤楫得喪苟自
達死生安足懞朱顏久不駐白髮何為鑷羣物自流轉
吾生寄天燮德相屢相過老夫寧足躡由來廢井水不
如長劒缺往往論書法軒軒兩目睫中郎石經在元常
表軍捷漢魏多傳人至宋有遺帖唐室初最盛漸衰自
中葉歐虞緬誰嗣顏柳何足躡篆籀昔難工草聖誰敢
輒巨山作散隸雄古掀龍鬚貞觀喜飛白凌厲騰春蝶

豈特豁神觀直可祛鬼魔古人有所寓天性難必協所
志有大小其材有勇怯或憚儒文雅或軒昂豪傑或轉
戰鞍馬或驅馳弋獵或發於止諫或得於訟牒或奮奪
牀陛或造成械摺或為神所追或自勢所却或醉以賈
禍或詐以行謀或習於娛樂或勞於呿喙有燦如文錦
有勁如金狹有倚如戈鋒有點如山業有駛或如波有
媚或如靨或騰如煙霏或落如鳥站淵妙欲飛動拙惡
愧偏摩當寢或不寐當晝亦忘飮有譽終甚微或毀則

羣囁為功有不至考古安能厭十年幸能就萬金毫豈
浥金玉敷卷軸龍蛇閱箱笈是惟小夫技寧當大夫業
譬如論唐虞何曾道郇葉如君負高識於此何足挾一
戰雖未霸遐心豈即怙朝廷方洽熙四方皆遠懾坐復
洮河地直擣幽燕脅朝夕奏奇功羣儒爭鼓篋太平任
文治口血何煩喋道德以為宇威武以為堞豈比叔孫
生雜用隨何頰吾哀何可道不死同原涉

德相惠新茶復次前韻奉謝

暑雨暗窮山道滑不可躡隱几念投老葛衣坐遙策林
端使者至乃得德相帖佳惠致新茗遠來自閩笈吾聞
北苑勝不與羣山接山下幾千家以此為生業新陽一
日至東風方獵獵百草尚勾甲靈芽已先捷所採僅毛
髮厥工巧烹燂甘泉列盎釜熾炭浩旁疊脩竹為之規
黃金為之挾形摹各臻妙製作易妥帖至尊所虛佇守
臣方惕懾其上為虬龍蜿蜒奮鱗鬣稍降乃交鳳文翼
相盤跼函封趣北道驛使互防挾四方老金玉擬議誰

敢輒屹屹健士檐飄飄迅溪牒穀雨不及潤權門已盈
篋帶跨體正方葵華角仍摩始傳盛王鄭後來止游葉
大為權勢迫小或盜賊劫其間起鬪奪亦數冒刑梟南
方出重購不憚浮海楫北邊比尤好喜笑開眉睫豈不
產卬蜀豈不生楚葉厥品乃大庆固難一理攝朱門厭
酒肉辯士厲舌頰儒生備夜誦農夫困朝饑禪翁過江
貧老獲空腹喋綺席夢騰騰玉山頭葉葉無魚乃尚可
非此意不厭一泛舌已潤載吸心更愜不唯豁神觀亦

足暢煩懣清冷生肺肝爽快勝抓鑷孰不恃薏苡伏波
煩謗囁孰不飲醇酎伯仁憂腐脅祖逖敦雅尚鴻漸未
博涉君謨號精鑒才翁亦相躡玉川七椀興令人解頤
壓奇章兩串賜遺芳在圖謀余昔喜賓客為世困書牒
輕重必酬酢往來煩躑躑自從竄荒裔所藏多敗絕亦
幸哀老年數病脾氣怯棄置在高閣魂夢昏多魘拘病
出湘漢餘生若蟬蝶希夷有幽卧刀劍銷銑缺一榻就
空曠百骸得和協久已廢翰墨况復道游俠有味養元

和無物累吾喙臨風欲占謝遙企山西懔

初創二山

左山叢古木縈帶多美竹右山少平地硃礧斷蒼玉於
此豈無竹蕭疎倚嵒谷上參九頂道俯浸清溪澳於彼
豈無石嵌崖大如屋景業讀書處基構有遺躅始吾購
二山何為不相屬中間古蘭若臺觀當山腹巖洞九十
七龍蛇所潛伏昔人作軒榭高深奇秋麓我乃巢西崦
手自親鉏斲青溪漫無際島嶼相重複雨餘山更佳春

流漲平谷下，矚池陽市。修煙弄芳馥，大江天上來。淮山
點眉綠，老夫豈無意？落日傲鴻鵠，東嶺亦誅茆。小菴粗
容足，六峰引南睇。九華勢相續，白雲與誰期。千載媚平
陸，清曠無俗韻。脩明資遠目，去秋已種麥。今春復栽栗，
野老豈余欺？東坡幸膏沐，二山誰與適？最與枯藤熟，相
見詎無人？顧我真麋鹿，一年一瞬事。何暇知委曲，得此
化餘年，不問君平卜。

初泊磁湖

時子瞻
在齊安

歸舟不解洞庭帆
舟上騷人雪滿簪
小駐武昌江北岸
春風今夜泊江南

清冷臺

山前繚繞白雲飛
山下溪流那復迴
不向此間休歇去
寧將白髮汙塵埃

左史洞

在北山

萬古齊山石誰聞
左史洞左史今何在
蒼崖本不動履
嶮下重壑幽深鬼神總
石門絕世路久為塵泥擁
青天

十畝地嶮屹如覆釜琬琰鑿屋壁煙霞列梁棟崖間不
死藥必非近時種人去境長在境與人為重欲觀疇昔
意幽禽發清唳吾方寄淵寂無礙亦無縱手自剪荆棘
結茆當石空長與麋鹿遊不復人間夢

送曾處善赴寶應尉

我初隱身治蓬蒿餘生不復人間世左山右山白雲上
一動一靜浮塵外齊山山上老夫庵青谿谿南侍中第
朱顏公子不易識短衣款段來相際長堤相望雖甚遠

有意即行終不計東鄰竹閣長夏熱我構雲巢方自蔽
爛斑石臺始一眺寂靜庵基猶未薙隨雲步訪胡矮老
放懷止得殊師利石橋寺前夜月冷金雞峰下秋霖霽
君恃馬足不憚遠我駕藍輿隨處稅六峰老師氣軒豁
九華雌山苦陰晦庵前菜茹常不厭城裏羊肩難數置
漫天風雪一暢目滿榻春陽欣炙背裘休自參黃檗禪
院福豈是一昌尉相見終年已解空分襟一別那成滯
拍江春水浮鷁首萬里青天運鵬翅順風莫寄南來書

老夫柴門多自閉

臺下

石梅落落欲黃時
細雨濛濛暗不開
數日不行臺下路
不知江水過山來

清冷臺初夏一首寄上翟舅

清冷竹樹暗成陰
漸有溪流過此岑
草草作巢方寄老
惜惜設榻本無心
松門不隔紅塵路
月疊初無俗物侵
欲向人間訪消息
渭陽應有遠遊吟

齊山偶題二首

杜子風情春水波至今詩句使人夸
不知朽骨猶存否
山上年年黃菊花

朝雲未散白筇陂落日已過銅陵西
不向人間生皓髮
直尋仙客上青谿

宋詩鈔卷三十八